



# SIARAN MEDIA

## SME CORP. MALAYSIA DAN ASPIRASI BEKERJASAMA BERI PEMBIAYAAN MIKRO KEPADA PKS DI MALAYSIA

**Kuala Lumpur, 28 September 2020** - SME Corporation Malaysia (SME Corp. Malaysia) sebuah agensi di bawah Kementerian Pembangunan Usahawan dan Koperasi (MEDAC), telah menandatangani perjanjian kerjasama dengan Aspirasi, pembiaya kewangan digital di bawah Axiata Digital, untuk memperkasakan PKS di negara ini melalui penyelesaian pembiayaan digital. Pertukaran Memorandum Perjanjian (MoA) pada hari ini di antara Encik Rizal Nainy, Ketua Pegawai Eksekutif SME Corp. Malaysia dan Encik Sheyantha Abeykoon, Pengarah Eksekutif Aspirasi telah disaksikan oleh YB Dato Sri Dr. Haji Wan Junaidi bin Tuanku Jaafar, Menteri Pembangunan Usahawan dan Koperasi. Perjanjian ini amat penting bagi merapatkan jurang perbezaan kewangan, serta membantu perniagaan yang kurang mendapat perhatian untuk mengaplikasikan teknologi ketika negara sedang menuju ke arah ekonomi digital.

Kerjasama ini akan memanfaatkan enterpris mikro di Malaysia melalui *Aspirasi Assist*, inisiatif dari Aspirasi yang menawarkan pembiayaan mikro patuh syariah daripada RM1,000 hingga RM20,000. *Aspirasi Assist* menawarkan terma-terma yang menguntungkan seperti penangguhan pembayaran selama 6 bulan dan kadar keuntungan serendah 0.5%, serta pemohon yang diluluskan akan menerima dana dalam tempoh 48 jam. *Aspirasi Assist* juga menyediakan insurans mikro sebagai faedah tambahan untuk melindungi pemohon yang diluluskan pembiayaan.

MEDAC melalui SME Corp. Malaysia akan bekerjasama dengan Syarikat Berkaitan Kerajaan (GLC) dan sektor swasta bagi meningkatkan lagi akses kepada pembiayaan untuk enterpris mikro, Usahawan dan enterpris mikro, terutama mereka yang terkesan dengan pandemik COVID-19 dan Perintah Kawalan Pergerakan (PKP) digalakkan untuk merebut peluang ini

bagi mendapatkan bantuan kewangan melalui kerjasama antara SME Corp. Malaysia dan Axiata Digital.

Encik Sheyantha Abeykoon, Pengarah Eksekutif Aspirasi berkata, “Di Aspirasi, nilai teras kami adalah untuk membantu kewangan komuniti yang kurang mendapat perhatian, dan kami berbesar hati untuk menawarkan *Aspirasi Assist* kepada PKS. Dengan menyokong mereka pada saat mereka memerlukan, PKS akan dapat meneruskan aspirasi perniagaan mereka tanpa masalah kewangan dalam tempoh yang mencabar ini”.

Turut hadir dalam majlis pertukaran MoA ini ialah YB Datuk Wira Hajah Mas Ermieyati Hj Samsudin, Timbalan Menteri Pembangunan Usahawan dan Koperasi; YBhg. Dato’ Sri Haji Mohammad bin Mentek, Ketua Setiausaha Kementerian Pembangunan Usahawan dan Koperasi; dan YBhg. Dato’ Sri Syed Hussien Al Habshee, Pengerusi SME Corp. Malaysia.

- TAMAT -